



SAVEZ OPĆINA I GRADOVA
FEDERACIJE BOSNE I HERCEGOVINE
Association of municipalities and cities of the FBiH

GODINA: XII
BROJ: 198
DATUM: 6.03.2015.GODINE



Usluge Saveza

• PRAVNO SAVJETOVALIŠTE:

Selma Fišek, viši saradnik za pravna pitanja
fax: + 387 33 552 810
selma@sogfbih.ba

• FINANSIJSKO SAVJETOVALIŠTE:

Dženita Kovačević, viši saradnik za finansijska pitanja
fax: + 387 33 552 810
dzenita@sogfbih.ba

Sadržaj biltena:

Održana 7. sjednica Predsjedništva Saveza

Izabrani novi načelnici u Kalesiji i Živinicama

Prigodnim svečanostima obilježen Dan nezavisnosti u mnogim lokalnim zajednicama širom BiH

Načelnik Općine B.Petrovac: Krajnje je vrijeme da se donese Zakon o šumama

U Kaknju otvoren muzej

Novi projekti sa IFAD-om na području općina BPK-a

Intervju: Stjepan Bošković, načelnik Općine Stolac

Obilježen Dan Općine Ilijaš i Dan nezavisnosti BiH

Općina Novi Grad Sarajevo dobiva biciklističku stazu po evropskim standardima

U Gradačcu u 2015. novi pogoni i 500 novih radnih mjesta

Intervju: Zlatko Hujčić, načelnik Općine Bosanski Petrovac

U toku radovi na pokrivanju nove zgrade Općine Kakanj

Javni poziv organizacijama civilnog društva

Javni konkurs Fonda za zaštitu okoliša za dodjelu sredstava

Bilten Saveza općina i gradova Federacije Bosne i Hercegovine

ODRŽANA SEDMA SJEDNICA PREDSJEDNIŠTVA SAVEZA OPĆINA I GRADOVA FBiH

U Čitluku je, 4. marta/ožujka održana sedma, redovna sjednica Predsjedništva Skupštine Saveza općina i gradova Federacije Bosne i Hercegovine.

U okviru dnevnog reda, a nakon usvajanja zapisnika i zaključaka sa ranije sjednice, u skladu sa Statutom Saveza izvršena je rotacija na mjestu predsjednika Predsjedništva, tako da je za naredni period od dvije godine, načelnik Općine Čitluk, Ivo Jerkić preuzeo mjesto predsjednika Predsjedništva Saveza od Husejina Smajlovića, gradonačelnika Zenice koji je na toj poziciji bio od 7. februara/veljače 2013. godine.



Predsjedništvu su prezentirani nacrti novih strateških dokumenata Saveza za period 2015. - 2019., o kojima je vođena i šira diskusija s obzirom da se njima usmjerava rad Saveza za narednih pet godina, te je tom prilikom Predsjedništvo usvojilo prezentirane dokumente.

Posebno su apostrofirane aktivnosti Saveza po pitanju izuzimanja jedinica lokalne samouprave od otplate duga prema Međunarodnom monetarnom fondu i pokretanje tužbe prema Federaciji Bosne i Hercegovine. Odlučeno je da će Savez općina i gradova Federacije BiH pokrenuti tužbu protiv predsjednika Federacije BiH, premijera i federalnog ministra finansija, a razlog je umanjene pripadajućih sredstava s jedinstvenog računa za općine zbog otplate kredita prema Međunarodnom monetarnom fondu.

Članovi Predsjedništva Saveza su istakli da je novac od kredita, uzimanih od Međunarodnog monetarnog fonda, utrošen u javnoj potrošnji Federacije i kantona, te da općine nisu koristile ta sredstva, a da su sada primorane ista vraćati. U opomeni pred tužbu, upućenoj predsjedniku Federacije BiH, premijeru Federacije BiH i federalnom ministru finansija potražuje se povrat iznosa od preko 18 miliona KM za koji su općine samo u 2013. godini oštećene po ovom osnovu. Predsjedništvo je razmatralo izvještaj sa održane sjednice Komisije za imovinska pitanja, prostorno uređenje, stambeno-komunalne djelatnosti i zaštitu životnog okoliša, a u vezi sa većim brojem inicijativa koje su pristigle iz općina i primilo je k znanju Informaciju sa održane javne rasprave o nacrtu Zakona o premjeru i registraciji nekretnina koju je Savez organizirao 6. novembra/studenog 2014. godine. Razmatran je i zahtjev Općine Konjic prema Ustavnom sudu FBiH za zaštitu prava na lokalnu samoupravu u vezi sa Zakonom o električnoj energiji, kojem je Predsjedništvo pružilo podršku.

Također, bilo je govora i o projektnim aktivnostima Saveza, kao što su: nastavak saradnje sa UNDP-om na više projekata, saradnja sa TI BiH na projektu „Jačanje integriteta u lokalnim samoupravama“, projektima koji se tiču energetske efikasnosti i zaštite okoliša, i drugi.

Predsjedništvo je informisano i o drugim aktivnostima realizovanim nakon prethodne sjednice a koje se tiču Inicijative Općinskog vijeća Breza za mogućnost liječenja građana općine Breza u Kantonu Sarajevo po kojoj su se očitovali Skupština Zeničko-dobojskog kantona i Federalno ministarstvo zdravstva, te o uključivanju Saveza po pitanju pružanja podrške Općini Vareš s ciljem deblokade računa ove općine.

Usvojen je i Izvještaj o radu Radne grupe za energetska efikasnost i Pravilnik o postupku direktnog sporazuma vezano za novi Zakon o javnim nabavkama.

Na jučerašnjoj sjednici, Predsjedništvo je usvojilo prijedlog za sazivanje redovne sjednice Skupštine Saveza, koji će biti upućen predsjedavajućem Skupštine Saveza.



IZABRANI NOVI NAČELNICI U KALESIJI I ŽIVINICAMA



**Asim Alijić, načelnik
Općine Živinice**

U općinama Kalesija i Živinice, 22. februara/veljače održani su prijevremeni izbori za načelnika općine.

U Općini Kalesija glasači su povjerenje dali kandidatu Stranke demokratske akcije Nedžad Džafiću, dok je u Općini Živinice pobjedu odnio Asim Alijić, također iz Stranke demokratske akcije. Na području općine Kalesija registrovano je 32.297 birača, a prema prvim preliminarnim nekompletnim rezultatima na izbore je izašlo 14.674, odnosno 45,73%, koji su mogli da biraju između 2 kandidata, i to: Džafić Nedžada (Stranka demokratske akcije) i Osmanović Muhameda (Socijaldemokratska partija BiH).

U općini Živinice je registrirano 53.433 birača, a na izbore je izašlo 23.080, ili 43,22%, koji su mogli da biraju između 6

kandidata, i to Pašić Fahrudina (Savez za bolju budućnost-Fahrudin Radončić), Alijić Asima (Stranka demokratske akcije), Forčaković Osme (Nezavisni kandidat), Agić Asmira (Demokratska fronta-Željko Komšić), Durić Saliha (Nezavisni kandidat) i Spahić Fahira (Socijaldemokratska partija BiH).



**Nedžad Džafić, načelnik Općine
Kalesija**

KORISNI LINKOVI ZA PREDPRISTUPNE FONDove EU:

www.southeast-europe.net
www.adriaticipacbc.org
www.interregadriatico.it
www.europa.ba
www.cbib-eu.org
www.cbc.bih-mne.org
www.srb-bih.org
www.cbc-cro-bih.net
www.programmemed.eu
www.tacso.org
www.euroinfocentar.ba
www.balkanfund.org
www.eurelmed.com
www.eacea.ec.europa.eu

PRIGODNIM SVEČANOSTIMA OBILJEŽEN DAN NEZAVISNOSTI U MNOGIM LOKALNIM ZAJEDNICAMA ŠIROM BOSNE I HERCEGOVINE

U povodu Dana nezavisnosti Bosne i Hercegovine, koji se obilježava 1. marta/ožujka, u mnogim lokalnim zajednicama širom Bosne i Hercegovine održane su svečane akademije.

U Kaknju održana svečana akademija povodom Dana nezavisnosti

„Svi smo mi ovu državu htjeli vidjeti drugačijom, boljom, bogatijom i uređenijom, ali je najvažnije da je opstala i da se vratila u život praktično sa ruba ponora u vremenu kada se agresivnim nasrtajima rušio njen suverenitet i rastakalo njeno državno tkivo“, poručio je općinski načelnik Nermin Mandra na svečanoj akademiji koja je, povodom Dana nezavisnosti BiH, upriličena u kino-sali Doma kulture u Kaknju.

Obraćajući se velikom broju građana Kaknja i gostiju iz drugih gradova načelnik Mandra je rekao da ne smijemo o Bosni i Hercegovini promišljati kroz prizmu njenog trenutnog ustavnog i društvenog uređenja i aktuelne teške ekonomske situacije, jer je Bosna i Hercegovina iznad svega i ona kao ideja opstaje vijekovima i nadživljava i političke sisteme, i ekonomske prilike, i društvena uređenja, i velika carstva, i agresivne osvajачke pohode, i rušenja, i satiranja...

Na svečanoj akademiji je nastupio Gradski hor Kulturno-umjetničkog društva "Fadil Dogdibegović Dikan" Kakanj, Omladinski hor maestra Milenka Karovića (Zenica), polaznici Plesne škole Kakanj, te polaznici kakanjske muzičke škole i muzičkog centra.



Sa proslave Dana nezavisnosti u Cazinu

Tradicionalnom svečanom akademijom i bogatim kulturno-umjetničkim programom, u sali Kulturnog centra Cazin obilježen 1. mart - Dan nezavisnosti

Tom prilikom je istaknuto da se ovaj praznik u Cazinu obilježava sa velikim ponosom, bez obzira na težinu situacije u kojoj se nalazi naša zemlja.

„BiH je zemlja s tužnim i ponekad zaista nesretnim periodima u svojoj historiji, ali da nije dragocjena i posebna na jedan osobit način, ne bi ni bila tako zanimljiva svima, koji je žele za sebe. Ima ova zemlja svoja bogatstva, svoje prirodne resurse i ogromne potencijale na svojoj relativno maloj površini. Imamo sve preduvjete da je razvijamo i popravljamo, kako bi bila još bolja. Do nas je i mi smo ključ njenog uspjeha. Molim Boga da ovaj 1. mart koji obilježavamo bude taj trenutak promišljanja i odluke u svima nama. Da se zainatimo, onako krajiški i pokazemo ostatku zemlje i svijeta, da se zajedništvom i radom pobjeđuju krize i sve nevolje, da BiH naredni Dan nezavisnosti dočeka u jeku velikih poboljšanja, velikih radova i daleko pozitivnije atmosfere“, kazao je u svom obraćanju načelnik općine Cazin mr Nermin Ogršević.



U Bužimu svečanom akademijom povodom Dana nezavisnosti završeni dani općine

Povodom 1. marta, Dana nezavisnosti Bosne i Hercegovine, u zgradi JU „Centra za kulturu, sport i informisanje“ održana je svečana akademija na kojoj su prigodnim obraćanjima o značaju jednog od najvećih praznika BiH govorili Općinski načelnik Agan Bunić i Abid Mulalić, ministar za pitanja boraca i ratnih vojnih invalida, koji se obratio u ime Vlade Unsko-sanskog kantona.

Akademiju je otvorio Općinski načelnik Agan Bunić koji je obraćajući se prisutnim građanima rekao da „nakon 23 godine i u Bužimu obilježava se Dan nezavisnosti, i to u sklopu Dana općine, koje skupa vežemo jedno za drugo, ali u skromnijem obilježavanju, međutim neće i ne smije umanjiti značaj tog datuma, kojeg smo tada izglasali sa 100 posto u našoj općini, i rekli sudbonosno DA na referendumu. Tad smo se borili za nezavisnost, svi znamo kako, i danas se borimo za državu, tako što ćemo biti dobar ljekar, prosvjetni radnik, privrednik, sportista.. Dragi sugrađani čestitam Vam 1. mart, Dan nezavisnosti BiH u ime općine Bužim. Nek nam živi jedna i jedina Bosna i Hercegovina“, istekao je načelnik Bunić u svom obraćanju.



Obilježavanje Dana nezavisnosti u Bužimu

Dan nezavisnosti BiH obilježen u Gračanici nizom svečanih aktivnosti

U svečanom referatu predsjedavajući Općinskog vijeća Gračanica Edin Ibrišević podsjetio je na vrijednosti ovog datuma za sve građane Bosne i Hercegovine, naglašavajući da su se pored svih nedaća koje su nas zadesile u daljoj i skorijoj prošlosti građani BiH i naše općine u godini iza nas suočili i sa katastrofalnim elementarnim nepogodama, ali da moraju biti ponosni na svoju domovinu i sve historijske napore na očuvanju njene opstojnosti. Dodao je da je upravo zbog svih događaja koji su nas pratili neophodno stalno jačanje zajedništva, pogotovo uz ovakve datume, te čestitao 1. mart, Dan nezavisnosti BiH.

Svečanom sjednicom Općinskog vijeće Ilidža obilježen 1. mart - Dan nezavisnosti

Svečanom sjednicom-akademijom Općinskog vijeća Ilidža u Multimedijalnoj sali 27. februara 2015. obilježen je 1. mart, Dan nezavisnosti BiH. Uz prisustvo vijećnika Općinskog vijeća, izvršne vlasti, poslanika u Skupštini Kantona Sarajevo, te predstavnika društvenog, javnog, političkog, privrednog i vjerskog života općine Ilidža prigodan referat podnio je predsjedavajući Općinskog vijeća Ilidža Muhamed Omerović. „Ovaj datum 1992. godine je zlatnim slovima upisan u hiljadugodišnjoj istoriji. Na referendumu održanom 1992. godine više od 66 posto građana BiH svih nacionalnosti odlučilo se za suverenu, nezavisnu, samostalnu i cjelovitu BiH, državu ravnopravnih naroda i građana. BiH je proglasila nezavisnost u svojim historijskim i međunarodno priznatim granicama. Mi ne bismo bili ono što smo, da smo tada u ime sumnjive sigurnosti izabrali potčinjavanje. Svaki narod ima svoju obećanu zemlju, naša obećana zemlja je Bosna i Hercegovina i pozivam vas da se za nju izborimo“ rekao je, između ostalog Omerović.

On je dodao da je naš cilj BiH zemlja slobodnih ljudi, država u kojoj će se poštovati svaki čovjek i njegova prava, te svim građanima čestitao 1. mart Dan nezavisnost.

Načelnik Općine prof. dr. Senaid Memić kazao je da 1. mart trebao biti najznačajniji datum za BiH i da bi se trebao i mogao više obilježavati i vizuelno. „Sve zemlje u svijetu imaju najveći praznik, a to je dan nezavisnosti. To bi trebao biti i najznačajniji praznik i za nas koji volimo svoju domovinu. Svaka ulica trebala bi biti okićena zastavama, svaka prodavnica, firma, ustanova da svi vidimo i da poručimo svima u svijetu da slavimo praznik države. Bez obzira na teškoće mi ćemo se izboriti za našu domovinu. Svim građanima BiH i dijasporu upućujem iskrene čestitke“, poručio je načelnik Memić.



Obilježavanje Dana nezavisnosti na Ilidži

U Domu kulture u Kladnju održana svečana sjednica povodom Dana nezavisnosti

U Kladnju je povodom Dana nezavisnosti Bosne i Hercegovine u Domu kulture održana svečana sjednica Općinskog vijeća Kladanj, a kojoj je prethodilo polaganje cvijeća na spomen obilježja ispred zgrade Općine.

Sjednicu je otvorio Refik Avdić, predsjedavajući Vijeća koji je prisutnima čestitao Dan nezavisnosti BiH i istakao da samo zajedništvom možemo da učvrstimo našu zemlju kao cjelovitu i nezavisnu državu i da nikad ne smijemo zaboraviti one koji su djelima pokazali kako se treba boriti za BiH onda kada je to bilo najpotrebnije i najrizičnije.

O značaju 1. marta Dana nezavisnosti, govorio je Jusuf Čavkunović, načelnik općine Kladanj koji je naglasio da se za ovih 23 godine mnogo toga promijenilo, ali da smo i dalje ostali vjerni principima za koje smo glasali i da i danas kao i svih ovih godina imamo isti cilj da na demokratski i miran način gradimo našu zemlju Bosnu i Hercegovinu.

U Novom Travniku obilježen 1. mart - Dan nezavisnosti Bosne i Hercegovine

Govoreći o značaju 1. marta, kada je 1992. godine održan referendum na kojem je većina građana glasala za nezavisnu BiH, Lendo je rekao da je održavanje referenduma skupo plaćeno, te da na Dan nezavisnosti trebaju biti ponosni svi bh. građani bez obzira na naciju i vjeru. „Čuvanje i jačanje BiH najvažnije je pitanje za sve nas. Trebamo graditi BiH u kojoj će ljudi različitih religija i nacija živjeti zajedno u slozi i miru. Projekt nezavisne BiH nema alternativu te se moramo boriti za dostojanstven život svakog građanina na svakom dijelu BiH“, kazao je Lendo.



Sa obilježavanja Dana nezavisnosti u Jablanici

Svečanom sjednicom Općinskog vijeća Jablanica obilježen 1. mart - Dan nezavisnosti

Svečanom sjednicom-akademijom Općinskog vijeća Jablanica u Kino sali, obilježen je 1. mart, Dan nezavisnosti BiH u općini Jablanica. Uz prisustvo vijećnika Općinskog vijeća, Izvršne vlasti Općine Jablanica, te predstavnika društvenog, javnog, političkog, privrednog i vjerskog života općine Jablanica, te građana i omladine Jablanice, prigodan referat posvećen Danu nezavisnosti naše države podnio je predsjedavajući Općinskog vijeća Jablanica Damir Šabanović, a novčane nagrade učenicima Osnovne škole Jablanica, povodom konkursa za najbolji literarni rad posvećen Danu nezavisnosti BiH, uručio je Općinski načelnik Salem Dedić. Kulturno- umjetnički doprinos svečanoj akademiji Općinskog vijeća Jablanica pružili su hor učenika Osnovne škole „Suljo Čilić“ i članovi folklornog ansambla FA „Neretva“ Jablanica.

Povodom 1. ožujka Dana neovisnosti BiH održana svečana sjednica OV Žepče

Dana 26. veljače 2015. godine, u kino-dvorani Doma kulture u Žepču, a povodom 1. ožujka Dana neovisnosti Bosne i Hercegovine, održana je svečana sjednica OV Žepče. Svečanoj sjednici OV Žepče su nazočili brojni vijećnici OV Žepče, kao i gosti iz društveno-političkog, kulturnog, vjerskog, javnog i sportskog života naše općine.

U svom govoru, Općinski načelnik Mato Zovko je svim građanima općine Žepče uputio iskrene čestitke povodom 1. ožujka Dana neovisnosti BiH, podsjetivši još jednom na najbolju i najhrabriju odluku koju su građani donijeli prije 23 godine, izjasnivši se na referendumu za samostalnu, neovisnu i suverenu Bosnu i Hercegovinu. „I nakon 23 godine i dalje živimo u složenoj državi. Ono što je dobro ovih dana i što na neki način ulijeva nadu je to da je na iznenađenje svih nas, usvojena izjava o daljnjem napretku i radnjama koje moramo poduzeti vezano za EU i euroatlantske integracije, a to je zajednička izjava koja je potpisana od sva tri člana predsjedništva, od svih političkih lidera i na zadovoljstvo svih nas usvojena u oba doma PSBiH. To je nešto što nam svima ulijeva nadu da će se ubuduće puno više gledati naprijed i što manje okretati unazad. Evo, i ja se nadam da će se vlast uskoro formirati i da će uzeti za rješavanje ona prioritetna pitanja za koja svi znamo koja su, te da će to biti što prije na opće zadovoljstvo sva tri konstitutivna naroda u BiH“, kazao je načelnik Zovko.

Dan nezavisnosti Bosne i Hercegovine obilježen je i u drugim mjestima širom BiH, kao što su: **Bosanska Krupa, Sanski Most, Odžak, Ilijaš, Jajce, Sarajevo, Centar Sarajevo, Novi Grad Sarajevo, Novo Sarajevo, Srebrenik, Tešanj, Travnik, Tuzla, Visoko, Zenica**, i drugi.

Prvi mart/ožujak je dan kojim se proslavlja opredjeljenje građana Bosne i Hercegovine, a koja je izražena kroz referendum, za razdruživanjem, odnosno povratom nezavisnosti Bosne i Hercegovine od Socijalističke Federativne Republike Jugoslavije. Referendum za nezavisnost BiH održan je 29. februara/veljače i 1. marta/ožujka, na preporuku Arbitražne komisije međunarodne konferencije o Jugoslaviji, u završnoj fazi disolucije bivše SFRJ. Referendumu je pristupilo ukupno 2.073.568 glasača što je predstavljalo izlaznost od 63,6%. Od ukupno izašlih na glasanje 99,7% je glasalo za nezavisnost. Rezultati referenduma su prihvaćeni 6. marta/ožujka iste godine u Skupštini Bosne i Hercegovine.

Ovaj dan se obilježava na osnovu Zakona o proglašenju 1. marta – ožujka danom nezavisnosti RBiH, kojeg je donijela Skupština RBiH, 28. februara/veljače 1995. godine.



Obilježavanje Dana nezavisnosti u Kaknju



Svečana sjednica Općinskog vijeća Novi Travnik povodom Dana nezavisnosti

**KORISNI LINKOVI ZA
PREDPRISTUPNE FONDove EU:**

www.southeast-europe.net
www.adriaticipacbc.org
www.interregadriatico.it
www.europa.ba
www.cbib-eu.org
www.cbc-bih-mne.org
www.cbc-cro-bih.net
www.programmemed.eu
www.tacso.org
www.euroinfocentar.ba
www.balkanfund.org
www.eurelmed.com
www.eacea.ec.europa.eu



NAČELNIK OPĆINE BOSANSKI PETROVAC Z. HUJIĆ ZA AGENCIJU ONASA: KRAJNJE JE VRIJEME DA SE DONESE ZAKON O ŠUMAMA



**Zlatko Hujić, načelnik Općine
Bosanski Petrovac**

"Imamo neke projekte koji nisu prioriteti, ali ih, ipak, radimo, kao što je gradnja zgrade za raseljene osobe. Sa druge strane, popravljamo kanalizaciju, vodovod, gradsku rasvjetu, puteve, i to su neke stvari koje su u normalnom svijetu normalne, a mi smo neobičan svijet i nama su ovo prioriteti", rekao je Hujić.

Zaključio je da Bosanski Petrovac "itekako ima budućnosti", te da ne bi provodio razne projekte da ne vjeruje u pozitivnu budućnost.

Postoji mnogo kompanija koje bi željele ulagati u Bosanski Petrovac, a problem je što ne postoji zakon o šumama, izjavio je za Agenciju ONASA načelnik Općine Bosanski Petrovac Zlatko Hujić.

"Kad bi dobili šume, a na tom smo putu, bilo bi dosta lakše. Imali bi jednu ekspanziju koja bi bila primjerena. Mislim da će ljudi koji vode ovu zemlju shvatiti da je krajnje vrijeme da se taj zakon donese. Inače, ovdje će se desiti nemiri. Odavde se krče šume na sve strane i krajnje je vrijeme da se donese zakon kako bi se šumama počelo gospodariti kako treba", kazao je Hujić.

Ocijenio je situaciju u Bosanskom Petrovcu "prolaznom", jer je jednak broj zaposlenih i nezaposlenih osoba.

Dodao je da se trenutno radi na nekoliko projekata.

U KAKNJU OTVOREN MUZEJ



Obilježavanje 1. marta – Dana nezavisnosti BiH, u Kaknju je proteklo u znaku otvaranja muzeja. Ovim činom Kakanj je poslao snažnu simboličnu poruku spremnosti da se spriječe svi pokušaji falsifikovanja historije naše domovine i mogući scenarij da se opet, zbog naših zatvorenih muzeja, vrijedno kulturno-historijsko blago izmješta iz BiH kako se dešavalo vijekovima.

Kakanj je izgradio i otvorio muzej, te time stekao uslove da se brojni artefakti koji su se čuvali u drugim gradovima vrate u grad u kojem je prije više od 100 godina otkriven čuveni Zgoščanski stećak.

Na svečanosti otvaranje muzeja koja je upriličena u okviru Programa obilježavanja 1. marta – Dana nezavisnosti BiH, vrpce su presjekli općinski načelnik Nermin Mandra i Izet Fejzović, direktor Javne ustanove za kulturu i obrazovanje Kakanj pod čijim će okriljem djelovati muzej.

Svečanost je započela himnom Bosne i Hercegovine, a odvijala se u dekoru kojeg su krasile djevojke iz Kaknja odjevene u srednjovjekovnu odjeću bosanskih kraljica i princeza, djevojke odjevene u tradicionalne nošnje bosanskohercegovačkih naroda, te veliki broj građana Kaknja i gostiju iz drugih gradova.

„Uz falsifikovanje naše historije, sva najznačajnija svjedočanstva naše državnosti iz srednjeg vijeka i drugih perioda naše historije su kroz vijekove odnošena iz naše zemlje, a da se i danas ne zna ko, kada i zašto je to učinio. Pravo je čudo da u proteklih 100 godina negdje van BiH nije prebačen i naš Zgoščanski stećak koji se u Sarajevu čuva od 1914. godine kada je prevezen iz Kaknja. Međutim, i danas postoji prijetnja da se nastavi trend odnošenja našeg kulturno-historijskog blaga. Čim se neki muzej ili institucija kulture zatvore brzo nakon toga počinju se rađati ideje da se ovaj ili onaj vrijedni artefakt, dokument ili spomenik prebaci negdje drugo gdje će se bolje i adekvatnije čuvati. Zato trebamo što prije otvoriti zatvorene muzeje i ustanove kulture, te pomoći sve one institucije, vjerske organizacije i druge subjekte koji čuvaju naše kulturno-historijsko blago kako bi se oni uspjeli izboriti sa prijetnjom da se zbog teških materijalnih prilika zaključavaju muzejske zbirke. Otvaranje muzeja u Kaknju ima upravo tu simboličnu poruku. Naš muzej u početnoj fazi nema velik i bogat fundus, ali šalje snažnu poruku da je moguće i da je nužno, bez obzira na teške prilike, otvoriti muzeje i zaustaviti prijetnju da se nastavi negiranje hiljadugodišnjeg kontinuiteta Bosne i trend odnošenja našeg historijskog blaga“, rekao je u izjavi za medije načelnik Mandra.

"Kad bi dobili šume, a na tom smo putu, bilo bi dosta lakše. Imali bi jednu ekspanziju koja bi bila primjerena. Mislim da će ljudi koji vode ovu zemlju shvatiti da je krajnje vrijeme da se taj zakon donese."



**Pečatni prsten iz
srednjovjekovne Bosne, jedan o
muzejskih eksponata**

Među artefaktima i predmetima koji su postavljeni u kakanjskom muzeju posebnu pažnju privlači srednjovjekovni zlatni pečatni prsten sa ljiljanom koji je 2012. godine pronađen u Zgošćanskoj nekropoli stećaka u kojoj je davno pronađen i čuveni Zgošćanski stećak.

Ovaj prsten i brojni drugi arheološki nalazi pronađeni na području Kaknja su čuvani u Muzeju grada Zenica, jer Kakanj nije imao uslove za deponovanje i čuvanje.

U kakanjskom muzeju su postavljeni eksponati koji svjedoče o srednjovjekovnoj bosanskoj državi čije začetak i postojanje historičari bilježe i na kakanjskom području. Muzej sadrži i eksponate iz historije industrijskog razvoja Kakanj, etnografske predmete, predmete iz perioda Odbrambeno-oslobodilačkog rata 1992-1995. godine...

Otvaranjem muzeja Kakanj je pokazao privrženost ideji Bosne i Hercegovine koja je vječna i koja će nadživjeti i politička uređenja, i teške ekonomske prilike, i sve prijetnje koje joj se vijekovima upućuju.

Posjeta muzeju je besplatna, a otvoren je svakog dana od 7:00 do 15:30 sati.



Sa otvaranja Muzeja

NOVI PROJEKTI SA IFAD-om NA PODRUČJU OPĆINA BPK-a

KORISNI LINKOVI ZA PREDPRISTUPNE FONDove EU:

www.southeast-europe.net
www.adriaticipacbc.org
www.interregadriatico.it
www.europa.ba
www.cbib-eu.org
www.cbc.bih-mne.org
www.srb-bih.org
www.cbc-cro-bih.net
www.programmemed.eu
www.tacso.org
www.euroinfocentar.ba
www.balkanfund.org
www.eurelmed.com
www.eacea.ec.europa.eu

4. mart/ožujak – Kako bi se upoznali sa detaljima IFAD-ovog projekta, te se pripremili za isti, kada javni poziv bude objavljen, zvaničnici BPK-a i općina u sastavu Kantona održali su sastanak sa direktorom Jedinice za koordinaciju poljoprivrednih projekata pri Federalnom ministarstvu za poljoprivredu, vodoprivredu i šumarstvo Halilom Omanovićem, na kome je razgovarano o realizaciji projekata koji će se finansirati putem Međunarodnog fonda za razvoj poljoprivrede (IFAD).

Riječ je prvenstveno o projektima koji se odnose na razvoj poljoprivredne proizvodnje, kao i na poboljšanje ruralne infrastrukture, tačnije asfaltiranje lokalnih ruralnih puteva.

Omanović navodi da su aktivnosti IFAD-a usmjerene u pravcu jačanja ruralnog sektora i ruralnih područja kroz jačanje poljoprivrednih kapaciteta, a sredstva planirana za finansiranje šestog po redu IFAD-ovog projekata za BiH iznose oko 30.222.000,00 miliona dolara, od čega će 64% sredstava biti uložena za projekte u Federaciji BiH, i projekat će trajati od 2015. do 2018. godine.

"Projekat je planiran i ugovoren samo se čeka ratifikacija u oba doma Parlamenta FBiH kako bi njegova implementacija počela. Ukupna vrijednost projekta je 30.222.000,00 miliona dolara, od čega Federaciji pripada 64%. Ovom prilikom želio bi se zahvaliti što ste me pozvali na sastanak, jer ste prepoznali da se kroz ovaj Projekat može pomoći razvoju poljoprivrede kao i razvoju ruralne infrastrukture i drago mi je da ste vi u BPK-a jedan Tim i da tako nastupate", istakao je Omanović. Naglasio je kako je jedan od ciljeva jučerašnjeg sastanka da se izvrše pripreme, kako bi se što spremnije dočekao početak implementacije ovog IFAD-ovog projekta.

Sastanku u zgradi Vlade BPK-a prisustvovao je i načelnik Općine Goražde Muhamed Ramović sa saradnicima koji je istakao važnost povratka IFAD-a na ovo područje, te dodao: "Mi kao Općina ćemo biti spremni sa projektima i oni će se najviše odnositi na putnu infrastrukturu, jer na području naše Općine imaju mjesne zajednice u kojima nema ni metra asfaltiranog puta. Općina Goražde će, također, aplicirati i za pomoć u nabavi hladnjače i sušare za voće i povrće."



Sa sastanka predstavnika općina i BPK

Riječ je prvenstveno o projektima koji se odnose na razvoj poljoprivredne proizvodnje, kao i na poboljšanje ruralne infrastrukture, tačnije asfaltiranje lokalnih ruralnih puteva.



INTERVJU: STJEPAN BOŠKOVIĆ, NAČELNIK OPĆINE STOLAC

Načelnik općine Stolac, Stjepan Bošković u intervjuu za Večernji list, koji prenosi web stranica Općine Stolac, ističe kako ova općina ima budućnost, a realizacijom određenih projekata koji su u tijeku, poput rekonstrukcije magistralne ceste Stolac - Neum, izgradnje hotela Bregava, otvaranja bazena..., Stolac bi trebao oživjeti. Bošković govori i o razlozima zbog kojih se 70 stranih i domaćih investitora odlučilo za kupnju zemljišta u ovoj općini i gradnju solarnih polja.



Stjepan Bošković, načelnik
Općine Stolica

• Brojne općine u FBiH su pred financijskim kolapsom. Kakvo je stanje u općini Stolica?

BOŠKOVIĆ: Stolica, kao i svaka druga općina, ima poteškoća u funkcioniranju. Mi smo 2004. godine bili pred blokadom. Kad sam ja preuzeo dužnost načelnika 16.11.2004. godine mi smo bili u dugu 1,2 godišnja proračuna. Proračun je bio milijun i dvjesto tisuća, a tada zaprimljen dug bio je milijun i petsto tisuća, s tim da su vrlo brzo počeli stizati dodatni računi. Danas općina Stolica nije u dugu, ali je na granici funkcioniranja jer smo i mi jedna od općina koje vraćaju kredite koje je podigla FBiH. Kreditna sredstva od MMF-a koje trebaju vraćati i općine su nam veliki problem. Ako nam PDV na godišnjoj razini raste, a općine na godišnjoj razini dobivaju 12-15 posto manje novca, onda je jasno da se FBiH previše zadužuje, a da mi vraćamo te kredite. Na ovaj način, općinama ne ostaje dovoljno novca za normalno funkcioniranje. Iako mi trenutno nemamo dugova, isto tako nemamo ni novca za velike projekte.

• U općinama zapadne Hercegovine posebno je naglašeno iseljavanje stanovništva od kada je RH ušla u EU. Ima li općina Stolica s tim problema?

BOŠKOVIĆ: Ima, kao i svaka druga općina. Ulazak RH u EU je nama mač s dvije oštrice. Hrvati u BiH imaju putovnicu RH, mogu ravnopravno konkurirati za posao diljem EU. Zbog teškog stanja našeg gospodarstva, mi ne možemo osigurati svima da rade i žive od svog rada, zbog čega nam mladi ljudi odlaze. Na nama je da se borimo s tim, međutim, opet, pitanje je koliko mi na lokalnoj razini možemo napraviti po tom pitanju, ipak, o nekim makroekonomskim pitanjima se odlučuje na višim razinama vlasti, mi smo servis građanima za osnovne potrebe i, ako je moguće, osigurati im nekom komunalnom infrastrukturom bolji život. Sami proračuni su takvi da ne možemo imati aktivniji pristup određenim gospodarskim pitanjima i nakanama otvaranja nekih pogona u Stocu.

• Kakvi su trenutno međunarodni odnosi u općini Stolica?

BOŠKOVIĆ: Kao i u svim općinama u BiH, međunarodni odnosi su dobri, iako se pojedini mediji trude to prikazati drugačije. Primjerice, kad se govori o problemu dviju škola pod jednim krovom, uvijek se uzima Stolica kao primjer, ponekad i Čapljina. Međutim, to kod nas uopće nije problem, mi u Stocu imamo dvije škole, jedna radi po planu i programu na hrvatskom jeziku, a druga na bosanskom jeziku. Ako dođete u Stolica i pitate roditelje, oni će vam reći da je ovo sada rješenje za ono što smo imali. Međutim, u medijima se to često ističe kao loš primjer, dok se rijetko spominje da cijela središnja Bosna ima taj problem. Pa imate apsurdnu situaciju da u Stocu ili središnjoj Bosni traže da se nešto ujedini, a u Konjever Polju traže da se nešto podijeli. Imamo mi taj apsurd, ali s njim živimo već deset godina. Bitno je naglasiti da su svi ljudi koji žive u Stocu za to da svatko poštuje svoj materinski jezik, kao i za to da mi poštujemo tuđi materinski jezik te da se taj proces i dalje odvija na normalan način. Međutim, Stolica ima jedan drugi problem, a to je što mnogo ljudi koji trenutno žive u Sarajevu su iz Stoca i vrlo su aktivni u nevladinim udrugama kao što je "Forum Bosna" ili Povjerenstvu za očuvanje nacionalnih spomenika, u Ministarstvu kulture FBiH. Upravo oni bi upravljali Stocom onako kako su oni osmislili, iako već godinama ne žive u toj općini. Tako, primjerice, Zakonom o prostornom planiranju na razini FBiH proglašenjem nacionalnih spomenika i zona zaštite preko neustavnog Ministarstva prostornog uređenja donose određene odluke za gradnju u tim zonama bez znanja općine Stolica, jer im to kao taj zakon dopušta, iako je on već jednom bio proglašen na Ustavnom sudu kao neustavan. Svi mi znamo da je prostorno planiranje na razini županija i općina definirano Ustavom, međutim, FBiH je sebi za pravo dala da može upravljati njime u onim sredinama gdje nema vlast, ili misli da bi trebala imati vlast, a ne može je ostvariti demokratskim lokalnim izborima. Iz tog razloga mi imamo međunarodnih, odnosno, prije bih ih nazvao međuinstitucionalnih problema.

"Kreditna sredstva od MMF-a koje trebaju vraćati i općine su nam veliki problem. Ako nam PDV na godišnjoj razini raste, a općine na godišnjoj razini dobivaju 12-15 posto manje novca, onda je jasno da se FBiH previše zadužuje, a da mi vraćamo te kredite."



Stolica

• **Možete li navesti jedan konkretan primjer u kojem Vlada FBiH ulazi u ingerencije općine?**

BOŠKOVIĆ: Vlada FBiH je na jednoj od svojih sjednica donijela, po našem mišljenju, nezakonitu odluku kojom je cijeli tok rijeke Bregave dala na upravljanje navladinoj udruzi "Forum Bosna" na čelu s Rusmirom Mahmutćehajićem na korištenje na 15 godina kako bi on mogao graditi neke objekte koje bi trebao poslije prisvojiti. Gradio bi ih novcem stranih donatora. Mi smo pokrenuli sve aktivnosti da tu odluku stavimo izvan snage. Također smo na nju upozorili sve mjerodavne institucije jer žalosno je da Vlada FBiH samo jednom odlukom daje vodno dobro jednoj nevladinoj udruzi bez ikakvog javnog poziva, natječaja, vrlo netransparentno i na kraju nezakonito. Primorani smo podnijeti kaznene prijave protiv svih sudionika koji su bili u tom lancu, a njih je više.

• **Kakva je suradnja s višim razinama vlasti?**

BOŠKOVIĆ: Ima segmenata gdje surađujemo, a ima i onih u kojima imamo poteškoća. Poteškoće su u birokraciji, međutim, moramo surađivati. To su razine vlasti koje se oslanjaju jedne na druge, posebice županija s kojom imamo dobre odnose. Završili smo određene projekte u suradnji sa županijom. Međutim, kada je u pitanju Vlada FBiH, u posljednje četiri godine nismo imali nikakvu suradnju, osim sporadičnih slučajeva s Ministarstvom kulture. Oni su nam uglavnom tijekom protekle četiri godine pravili probleme. Nadam se da će se s novom vlasti okrenuti nova stranica i ispraviti ono što se može ispraviti.

• **Protiv Vas su pokrenute određene kaznene prijave, o čemu se konkretno radi?**

BOŠKOVIĆ: SDP je sebi uzeo za obavezu već 2012.-2013. godine da načelniku treba nešto "spakirati". Dobio sam informaciju da će u 2014. Tužiteljstvo pokrenuti neki proces protiv mene. U travnju 2014. su pokrenuli jednu kaznenu prijavu, međutim, imam informaciju da je ona odbačena zbog nepostojanja kaznenog djela. Zadnja prijava koja se pojavila je u vezi proslave Dana općine. Nama Dan općine pada na blagdan sv. Ilije, pa su pokrenuli tužbu kako ja proslavam na taj dan dijelim narod. Iako ja ne sazivam sjednice Općinskog vijeća i ne određujem kada će biti proslava, ja sam u prvom planu kao glavni krivac, tako da sam i tu morao davati iskaze federalnom MUP-u. Nadam se da od toga nema ništa jer se radi o politički montiranoj prijavi. Međutim, to je taj problem SDP-a da on svom svojom infrastrukturu uspijeva vrlo brzo progurati te svoje tužbe. Treba reći kako je u svibnju 2007. kad je isti taj podnositelj tužbe protiv mene, Nermin Dizdar, slomio postaju križnog puta i time se javno hvalio, prijava koja je podnesena protiv njega, jer je svojim činom stvarno radio na podrivanju rasne, nacionalne i vjerske netrpeljivosti, bila odbačena.

• **Otvaraju li se nova radna mjesta u ovoj općini?**

BOŠKOVIĆ: Sve što se trenutačno otvara je u privatnom sektoru. Mi, načelnici općina u regiji znamo da je jedino to način na koji možemo otvoriti jedno novo radno mjesto. U upravi, odnosno ustanovama koje se oslanjaju na općinski proračun nemamo previše prostora. Uglavnom tu nastojimo preko nekih radnih mjesta gasiti određene socijalne slučajeve preko plaće. Radna mjesta u privatnom sektoru su naša budućnost. Općina Stolac je otvorila novu gospodarsku zonu u Hodovu, gdje ulažemo u infrastrukturu, i dočekali smo da u toj gospodarskoj zoni imamo objekt u kojem radi 30 osoba. To je velika stvar, ako se prisjetimo da je Stolac prije četiri godine bio grad slučaj. Također imamo naznake da bi u ovoj gospodarskoj zoni moglo doći do otvaranja još nekih tvrtki jer blizina Stoca određenim gradilištima, kao i sama uređenost spomenute gospodarske zone, daje nam za pravo da bi, ja se nadam, u 2015. negdje oko 60 novih radnih mjesta otvorili. Posebna priča je naše solarno polje na Hodovu. Tu imamo više od 70 investitora koji su kupili zemljište i svoj novac ulažu u pokretanje solarnih elektrana. Nadamo se da će to polučiti rezultat imajući u vidu da ti investitori već sada lobiraju kako bi što prije počeli s radom.

• **Spomenuli ste solarne elektrane, u nekim drugim općinama ljudi su se žalili kako imaju problema s dolaskom do dozvola za otvaranje ove vrste elektrana. Kakva je procedura u Stocu?**


BOŠKOVIĆ: Išli smo vrlo iskreno prema svim investitorima. Sve ono što općina Stolac treba osigurati, to uradimo u najkraćem roku. Sam broj od 70 ljudi koji su došli iz BiH i inozemstva i planiraju graditi, dovoljno govori. Jasno smo im rekli da možemo osigurati sve dozvole koje su u našoj ingerenciji, ipak za ono što je na višim razinama vlasti, ne možemo jamčiti. Ovdje ispada da su općine bile brže u nekim idejama koje više razine vlasti nisu zakonski mogle pratiti zbog čega dolazi do problema u birokraciji. Treba reći i kako ovih 70 investitora imaju pozitivno iskustvo u Stocu jer se nije mogao naći nitko tko će ih reketariti.



Stolac, stari grad

**KORISNI LINKOVI ZA
PREDPRISTUPNE FONDVE EU:**

www.southeast-europe.net
www.adriaticipacbc.org
www.interregadriatico.it
www.europa.ba
www.cbib-eu.org
www.cbc-bih-mne.org
www.srb-bih.org
www.cbc-cro-bih.net
www.programmemed.eu
www.tacso.org
www.euroinfocentar.ba
www.balkanfund.org
www.eurelmed.com
www.eacea.ec.europa.eu



Stolac, nektopola stećaka



• **Kako je moguće da se netko iz EU odlučio ulagati u općinu koja je donedavno imala prefiks "slučaj"?**

BOŠKOVIĆ: Vjerojatno zbog našeg iskrenog pristupa, ali i pozicije te zone. Ti investitori nisu mogli vjerovati da postoji jedna uprava koja neće zatezati birokratski u tom dijelu, čak što više, da će određene stvari raditi za njih. Znali smo da bi, ako se odlučimo na koncesije, stvorili probleme za investitore, zbog čega smo se odlučili na ovaj drugi način prodaje zemljišta. To je bio jedini način da izbjegnemo birokraciju na višim razinama i to je razlog što su ljudi došli u Stolac.

• **Cijeli Stolac je jedan veliki turistički potencijal. Koliko se on koristi i može li bolje?**

BOŠKOVIĆ: Imamo velik potencijal, vrlo malo iskorišten. S JU Radimlja smo pionirski krenuli u pothvat bolje promocije naših turističkih potencijala. Naravno da mi kao uprava ili javna ustanova ne možemo to razvijati sami i treba nam pomoć privatnog sektora. Stolac je jedno veliko kulturno-povijesno nalazište s puno spomenika kulture, dvije nekropole koje će uskoro biti na UNESCO-ovoj listi. Sve predradnje smo napravili da se hotel Bregava privatizira, bazeni pređu u privatno vlasništvo i da imamo puni smještajni kapacitet koji možemo koristiti za ono što imamo u Stocu, koji je grad muzej. Prošle godine je kroz Radimlju prošlo 9000 ljudi, ove godine očekujemo minimalno 20 tisuća ljudi jer smo ojačali kapacitete ove javne ustanove u stručnom kadru, promidžbi... Nadam se da ćemo i ovaj privatni sektor podignuti kako bismo svi zajedno gradili budućnost Stoca, pa i turizmom, gdje bi naša ponuda bila naša kulturno-povijesna baština.

• **Što konkretno Stocu nedostaje, jesu li to hoteli, restorani...?**

BOŠKOVIĆ: Stolac je prije rata imao jedan od najljepših hotela, a to je Bregava. On je privatiziran preko Agencije za privatizaciju naše županije, kupili su ga Makart hoteli iz Čapljine i imamo određena saznanja da se radi glavni projekt budućeg hotela koji će biti možda i ljepši od onog prije. Kroz taj hotel će biti provučena povijest Stoca. To je privatni investitor i ne možemo mi govoriti kad će početi s gradnjom, iako vjerujemo da će to biti uskoro. Nadam se da će taj hotel biti održiv jer će omogućiti i zimski turizam. Vjerujem da bi ovo ljeto i bazeni trebali biti u funkciji.

• **Najavljena je rekonstrukcija magistralne ceste Stolac - Neum, što očekujete od ove prometnice?**

BOŠKOVIĆ: Tražimo da se aktivnije pristupi gradnji dionice Stolac - Neum.

Znamo da je u tijeku izrada projekta i kuda će trasa biti postavljena te da imamo potporu buduće Vlade FBiH za ovaj projekt. Ova magistralna cesta Stolac otvara, jer njome, između ostaloga, naša gospodarska zona Hodovo dobiva na važnosti. Također i Neum će izgradnjom ove ceste dobiti na važnosti. To je jedan od strateških projekata za našu općinu i nadam se da će biti jedan od prioriteta Vladi FBiH. Izgradnjom ove ceste vožnja od Stoca do Neuma će se skratiti za više od pola sata.

"Stolac je jedno veliko kulturno-povijesno nalazište s puno spomenika kulture, dvije nekropole koje će uskoro biti na UNESCO-ovoj listi."

OBILJEŽEN DAN OPĆINE ILIJAŠ I DAN NEZAVISNOSTI BIH

Dan Općine Ilijaš i Dan nezavisnosti Bosne i Hercegovine obilježen je u periodu od 19.02. – 01.03.2015. godine sljedećim aktivnostima: svečanom dodjelom Ugovora o stipendiranju učenika i studentima, održavanjem Malonogometnog turnira, Projekcijom dokumentarnog filma "Logori smrti", Izložbom dječijih radova, Danom JU OŠ "Stari Ilijaš" održavanjem državnog seniorskog prvenstva u stonom tenisu, polaganje cvijeća na Centralnom spomen obilježju, svečanom sjednicom Općinskog vijeća, turnirom u karateu u organizaciji Centra borilačkih vještina "BUNKAI" i Izborom sportiste godine.

U nedjelju, 01. marta održana je centralna manifestacija, polaganjem cvijeća na Centralnom spomen obilježju, učenjem Fatihe i minutom ćutnje prisutni su se prije svega prisjetili i odali počast šehidima i poginulim borcima a zatim je održana i svečana sjednica Općinskog vijeća Ilijaš.

Na svečanoj sjednici prisutnim su se obratili Predsjedavajući Općinskog vijeća Ilijaš g. Damir Filipović i Općinski načelnik g. Akif Fazlić, koji je u svom obraćanju istakao: "Jedan od najznačajnijih datuma u modernoj historiji naše općine je 29. februar - datum kada je općina Ilijaš reintegrirana u Federaciju BiH. Taj značajan datum je značio kraj beznađa za 13.000 stanovnika Ilijaša koji su bili iseljeni iz svojih domova, a to je ujedno i početak doseljavanja ljudi iz raznih krajeva, posebno iz Istočne Bosne.

Na svu sreću taj period je iza nas, devetnaest godina poslije reintegracije Ilijaš živi bolje. Da smo na dobrom putu govori nam prethodna 2014. godina koja je bila godina značajnih rezultata za općinu Ilijaš u kojoj su realizovani brojni projekti iz oblasti obrazovanja, zdravstva, komunalne i saobraćajne infrastrukture, društvenih djelatnosti. Očekujem da će 2015. godina imati trend nastavka napredovanja u svim sferama."



Dodjela priznanja Općinskog načelnika u oblasti kulturno-obrazovnih segmenata

Na svečanoj sjednici dodijeljena su i općinska priznanja pojedincima i kolektivima koji su zaslužni za unapređenje i razvoj lokalne zajednice u oblasti kulturno-obrazovnih segmenata.

Tradicionalnom manifestacijom Izboru najboljih sportista, sportistkinja, sportskih kolektiva, sportskih radnika općine Ilijaš, koji sport Općine Ilijaš pronose slavom, širom naše domovine i izvan njenih granica, obilježavanje Dana općine je završeno.

"2014. godina bila izuzetno uspješna, jer smo dobili dva premijerligaša, a pojedinci svojim uspjesima pronose lijep glas o našem gradu učvršćujući tako imidž sredine naklonjene sportu te obećavši da će i dalje Općina Ilijaš podržavati rad klubova i nagrađivati sportske uspjehe usprkos socio-ekonomskoj krizi, koliko to bude u mogućnosti" riječi su Općinskog načelnika.

Za sportašicu Općine Ilijaš 2014. godine proglašena je Emina Brkića, članica Karate kluba "Rašid Buća", a za sportša Hamza Jasmin, član Centra borilačkih vještina "BUNKAI", koji su u 2014. godini ostvarili zapažene rezultate kako na domaćim tako i na međunarodnim takmičenjima.

OPĆINA NOVI GRAD SARAJEVO NA LJETO DOBIVA BICIKLISTIČKU STAZU PO EVROPSKIM STANDARDIMA

Radovi na izgradnji prve faze biciklističke staze na području općine Novi Grad Sarajevo, u dužini od 2,12 kilometara odvijaju se intenzivnom dinamikom. Staza će prolaziti obostrano - Bulevarom Meše Selimovića i dijelom Zmaja od Bosne, od Nedžarića do mosta na Otoci, navodi se u saopćenju Općine Novi Grad Sarajevo.

Tako će na ljeto, Općina Novi Grad biti prva općina u BiH, koja će imati izgrađenu biciklističku stazu po evropskim standardima.

Radnici KJKP „Rad“, prema planiranoj dinamici, izvode zemljane radove, koji podrazumijevaju skidanje asfalta, postavljanje tampona i ivičnjaka. Trenutno ove radove izvode na trasi duž Bulevera Meše Selimovića, od pijace Heco do RTV doma, s tim da će uskoro nastaviti sa izgradnjom staze do Otoke.

Planirano je da se, čim se steknu vremenski uvjeti, postavi pigmentirani asfalt, koji se zbog svoje kvalitete uglavnom koristi kao podloga za biciklističke staze. Duž staze predviđena je i horizontalna signalizacija, a moći će se koristiti i usluge bežičnog interneta (WI-FI).

U međuvremenu, Općina Novi Grad, koja maksimalno i efikasno pruža svu potrebnu administrativnu podršku, izgradit će dva odmorišta duž staze na području svoje općine.

Po okončanju prve faze, planirana je izgradnja biciklističke staze kroz općinu Novo Sarajevo i Centar, do mosta Skenderija. Ukupna dužina staze prema projektu, koji po prvi put tretira biciklistički saobraćaj u gradu Sarajevu, je sedam kilometara. Izradu projekta i izvođenje radova zajedno finansiraju Grad Sarajevo i Direkcija za puteve Kantona Sarajevo.



Radovi na izgradnji biciklističke staze

KORISNI LINKOVI ZA PREDPRISTUPNE FONDOVE EU:

www.southeast-europe.net
www.adriaticipacbc.org
www.interregadriatico.it
www.europa.ba
www.cbib-eu.org
www.cbc.bih-mne.org
www.srb-bih.org
www.cbc-cro-bih.net
www.programmed.eu
www.facso.org
www.euroinfocentar.ba
www.balkanfund.org
www.eurelmed.com
www.eacea.ec.europa.eu



Grb Općine Gradačac

U GRADAČCU U 2015. NOVI POGONI I 500 NOVIH RADNIH MJESTA

20. februar/veljača – Za Općinu Gradačac 2014. godina bila je puna izazova, od protesta, velikih prirodnih nesreća, ali i realiziranih brojnih kapitalnih projekata, unaprijeđena je infrastruktura, a bilježi se i veće izvršenje budžeta nego prethodnih godina, izjavio je za Poslovni portal eKapija.ba načelnik Općine Gradačac Edis Dervišagić.

Realizirani projekti

Govoreći o konkretnim realiziranim projektima, Dervišagić je spomenuo da je u potpunosti rekonstruisan putni pravac u mjesnim zajednicama Međiđa Donja - Međiđa Srednja u iznosu od 500.000 KM.

Prema njegovim riječima, završena je i druga faza građevinskih radova u Aleji kestenova u centru Gradačca, a radovi na ovom projektu nastaviti će se i ovoj godini, kako bi Gradačac poprimio savremeniji izgled.



Edis Dervišagić, načelnik
Općine Gradačac



Spriječeno je korištenje i dalje odlaganje otpada na deponiji „Višnjik“, a krenulo se u realizaciju izgradnje regionalne deponije na području općine Orašje u partnerstvu sa općinama Orašje i Srebrenik, te Brčko Distriktom.

"Našu divlju deponiju u prvoj fazi ogradili smo i pristupili njenom postepenom saniranju, što je vrlo važno za građane koji žive na tom području. Pored toga u industrijskoj zoni, riješeno je nekoliko putnih pravaca u svrhu stvaranja povoljnijih uslova za poslovanje privrednim subjektima na tom području", rekao je Dervišagić.

Što se tiče jačanja privrednih kapaciteta, industrijska zona II ima 3.000 zaposlenih radnika i a Općina stavlja na raspolaganje građevinsko zemljište i ponudit će ga potencijalnim investitorima za ulaganja.

Privode se kraju i radovi na kružnom toku, na raskrnicu između Gradačca, Bosanskog Šamca i Modriče.

Dervišagić je pojasnio da je raskrsnica riješena kao moderni kružni tok sa saobraćajnicama sa po dvije trake u svakom smjeru, čime je rasterećena saobraćajna gužva. Cijelokupan projekat iznosio je oko 400.000 KM.

Investicije na području općine Gradačac u 2014. godini bile mnogo veće u odnosu na godinu prije.

Rješenje dugogodišnjeg problema vodosnabdijevanja

Načelnik Općine Gradačac spomenuo je da je potpisan ugovor o zajmu sa Evropskom bankom za obnovu i razvoj (EBRD) kojim se Banka obavezuje da u narednim godinama investira na području općine Gradačac 9.000.000 eura s ciljem rješenja dugogodišnjeg problema vodosnabdijevanja.

"Kreditnim sredstvima u iznosu od 6.000.000 eura sa kamatom od jedan posto, grace periodom od tri godine i rokom otplate od 15, te grantom od 3.000.000 eura trebao bi biti riješen problem vodosnabdijevanja u južnom dijelu općine. Tu se nalazi 15 mjesnih zajednica sa oko 5.000 domaćinstava, što predstavlja polovinu cjelokupnog stanovništva Općine Gradačac", objasnio je Dervišagić.

Rekao je da bi građani trebali dobiti novu vodovodnu mrežu, a predviđena su sredstva i za rekonstrukciju sekundarne mreže u Gradačcu, koja ima velike gubitke.

Tim projektom Općina Gradačac eliminirat će sve opasnosti od eventualnih redukcija vode u samom gradskom jezgri, a predviđeno je i proširenje kanalizacione mreže i izgradnja novog prečištača otpadnih voda.

Ujedno, to je i preduslov da bi eventualno potencijalni privredni investitori došli u Općinu Gradačac.

Veliki privredni subjekti

Dervišagić je spomenuo da je nezaposlenost jedan od problema sa kojima se suočava Gradačac.

"Prema evidenciji Zavoda za zapošljavanje TK, imamo oko 7.000 nezaposlenih osoba. Ipak to nisu realni pokazatelji, jer mnogo građana radi na crno. Nadam se da će nova Vlada Federacije BiH pronaći adekvatan odgovor za prijavljivanje svih radnika u radni odnos", kazao je gradačacki načelnik.

Na području općine Gradačac postoji nekoliko industrijskih zona u kojima su instalirani veliki metaloprerađivački kapaciteti, od CIMOS-a, Kovgrada do manjih firmi.

Dervišagić je naveo da u zadnje vrijeme na području Gradačca radi nekoliko velikih investitora u prehrambenoj industriji, poput mljekare Zott i Laktalisa, koji uspješno posluju i šire svoje kapacitete.

Osim prehrambene industrije, tu je i tekstilna industrija, Kula Gradačac, odavno poznat brend, koji takođe širi proizvodnju.

Za 2015. godinu najavljeno je otvaranje novih proizvodnih pogona u Gradačcu u kojima bi trebalo biti zaposleno 500 novih radnika.

"Imamo i veoma razvijenu poljoprivredu, ali imamo problem oko plasmana poljoprivrednih proizvoda. To je ono čime bi se ozbiljnije trebala pozabaviti sama država, oko izvoza na tržišta zemalja zapadne Evrope ili Turske", dodaje Dervišagić.

Vrlo dobra saradnja sa susjednim općinama

Govoreći o saradnji sa susjednim općinama, Dervišagić je rekao da je ona vrlo dobra, a sa nekoliko njih rade se i zajednički projekti.

"Zajedničke projekte implementiramo sa općinama Gračanica, Srebrenik i Orašje, a vrlo kvalitetnu saradnju imamo i sa Gradom Sivas iz Turske", kazao je načelnik Općine Gradačac.

Izvor: eKapija.ba

"Kreditnim sredstvima u iznosu od 6.000.000 eura sa kamatom od jedan posto, grace periodom od tri godine i rokom otplate od 15, te grantom od 3.000.000 eura trebao bi biti riješen problem vodosnabdijevanja u južnom dijelu općine. Tu se nalazi 15 mjesnih zajednica sa oko 5.000 domaćinstava, što predstavlja polovinu cjelokupnog stanovništva Općine Gradačac."



Gradačac – panorama

INTERVJU: ZLATKO HUJIĆ, NAČELNIK OPĆINE BOSANSKI PETROVAC

27. februar/veljača – Načelnik Općine Bosanski Petrovac Zlatko Hujic u intervjuu za Poslovni portal eKapija.ba govori, između ostalog, o realizovanim projektima, poduzetničkim zonama, privrednim subjektima, preduzetim mjerama na privlačnju investicija, velikim ličnostima iz Bosanskog Petrovca, kao i budućim projektima.

Razgovarao: Kenan Silajdžija



Bosanski Petrovac

Kako ocjenjujete 2014. godinu za Općinu Bosanski Petrovac?

Z. HUJIĆ: Protekla 2014. godina u cijelom svijetu, pa i Bosni i Hercegovini, obilježava se kao teška godina za poslovno okruženje, a u BiH praćena je dodatnim turbulencijama u političkom i finansijskom smislu. Uzimajući u obzir takvo stanje možemo reći da je Općina Bosanski Petrovac 2014. godinu završila uspješno, sa velikim brojem realiziranih infrastrukturnih projekata i sa finansijskom stabilnošću budžeta. To se itekako odrazilo na kvalitet i zadovoljstvo života stanovnika općine, jer su načinjeni veliki iskoraci. Posebno želimo istaći disperziju projekata, jer su projekti rađeni za uže gradsko područje i za brojna ruralna područja.

Koje značajnije projekte je Općina Bosanski Petrovac uradila u 2014. godini?

Z. HUJIĆ: Općina Bosanski Petrovac realizirala je veliki broj infrastrukturnih projekata, neki od njih bili su na čekanju dosta dugo, a neki čak i decenijama stari. Sadašnja općinska struktura skupila je snage da te projekte uzme u prioritet. Samo u prošloj godini izgrađeno je više od 10,5 kilometara nove kanalizacione mreže, čija je vrijednost veća od 1,5 miliona KM. Završena je druga faza vodovoda Kapljuh-Janjila sa vrijednošću 150.000 KM. Za poboljšanje poslovnog ambijenta Općina Bosanski Petrovac dodatno je radila na proširenju poslovne zone i izgradnji pristupnog puta, projekt u koji je uloženo 200.000 KM. Za poslovnu zonu izgrađena je prva faza rezervoara za vodu u vrijednosti od 100.000 KM. Općina Bosanski Petrovac tokom 2014. godine značajno je proširila javnu rasvjetu, kako u gradu, tako i po mjesnim zajednicama, a projekt će biti nastavljen i u narednim godinama.

Ko su najznačajniji privredni subjekti na području općine Bosanski Petrovac?

Z. HUJIĆ: Visoki vrhovi planinskog lanca Grmeča koji okružuju prostor općine Bosanski Petrovac izuzetno su bogati šumom, time su i usmjerili privredu na eksploataciju i preradu drveta. Drvna industrija iz Bosanskog Petrovca, putem ŠPD Unsko-sanske šume, posječe više od 200.000 metara kubnih drvene mase. A značajni su i kapaciteti za preradu drveta: RHM d.o.o., ASIKS d.o.o., te Pirnar d.o.o.. Osim ovih privrednih društva, u Bosanskom Petrovcu jedno od najznačajnijih je Bosnplast D.D. za preradu plastičnih masa. Zastupljeni su, takođe, i drugi proizvodni pogoni, te privredna društva iz oblasti trgovine i usluga.

Koje aktivnosti Općina poduzima u svrhu privlačenja investitora trenutno?

Z. HUJIĆ: Općina Bosanski Petrovac nastoji iskoristiti svoju poziciju da se približi potencijalnim investitorima, kako domaćim, tako i stranim. Geografski položaj i blizina granice Evropske unije, potencijalni su faktor atraktivnosti. Mi sa naše strane uradili smo značajne korake u izgradnji poslovnih i industrijskih zona, te osiguranja drugih uslova za kreiranje poslovnog okruženja. Značajne resurse općina Bosanski Petrovac ima u poljoprivredi i drvnoj industriji, solarnu energiju, ali i ostale grane nisu zanemarljive. S naše strane mi investitora pomažemo da mu osiguramo prostor za izgradnju pogona za investiranje, i uz uslove zapošljavanja određenog broja radnika oslobađamo ga plaćanja dijela naknada.

Koliko poslovnih zona ima na području općine Bosanski Petrovac, kolika je površina, koliko parcela ima i za koji tip industrije su namijenjene?

KORISNI LINKOVI ZA PREDPRISTUPNE FONDove EU:

www.southeast-europe.net
www.adriaticpacbc.org
www.interregadriatico.it
www.europa.ba
www.cbib-eu.org
www.cbc.bih-mne.org
www.srb-bih.org
www.cbc-cro-bih.net
www.programmed.eu
www.facso.org
www.euroinfocentar.ba
www.balkanfund.org
www.eurelmed.com
www.eacea.ec.europa.eu



Grb Općine Bosanski Petrovac



Z. HUJIĆ: U Bosanskom Petrovcu trenutno postoje tri poslovne-industrijske zone, Poslovna zona Gorinčani sa 10 hektara na 11 parcela, Industrijska zona Bosanski Petrovac sa oko 21 hektar na 23 parcele, i Poslovna zona Kolunić sa oko dva hektara sa jednim proizvodnim pogonom. Osim Poslovne zone Kolunić ostale zone u mogućnosti su da prošire svoje kapacitete kad bude zainteresiranih investitora za to. Industrijska zona Bosanski Petrovac namijenjena je i za proizvodno-poslove objekte, administrativno poslove i uslužne djelatnosti. Poslovna zona Gorinčani namijenjena je za sve buduće investitore i zavisice od namjere investitora.



Bosanski Petrovac

Šta su to trenutno najveći problemi Općine Bosanski Petrovac, da li su to nezaposlenost, loša infrastruktura ili nešto treće?

Z. HUJIĆ: Kao i većina općina u Bosni i Hercegovini i Bosanski Petrovac susreće se sa problemima nezaposlenosti, kao posljedicom loše i promašene privatizacije, koja je većinu prijeratnih privrednih subjekata odvela u zatvaranje. Općina Bosanski Petrovac ima oko 8.000 stanovnika, i budžet koji iznosi 3,6 miliona KM. Općina površine veće od 700 kvadratnih kilometara, sa mrežom lokalnih puteva koje održava Općina većom od 300 km, velikim brojem razbuđenih naseljenih mjesta, sigurno se susreće sa poteškoćama u infrastrukturi. Ali u toku su veliki infrastrukturni zahvati, zatim projekat izgradnje kanalizacione i vodovodne mreže u gradu, čiji ukupna vrijednost projekta više od 5.000.000 KM. U toku su i izgradnja dva vodovoda u seoskim mjesnim zajednicama, u naseljima Kapljuh i Janjila. Kao i elektrifikacija naseljenih mjesta. Međutim, najveći problem općine Bosanski Petrovac jeste nedostatak sistemskog zakona koji reguliše pitanje eksploatacije šume. Više od pet godina se čeka donošenje Zakona o šumama Federacije BiH. Neuređenom načinom gazdovanja šumom Općina Bosanski Petrovac značajno je oštećena, te iskorištavanje šumskog bogatstva sa područja Bosanski Petrovac ne prati srazmjeran benefiti za stanovništvo ove općine.

Interesantno je da je jedna tako mala sredina, kao što je Bosanski Petrovac dala veliki broj bosanskih velikana poput Bijelića, Hromadžića, Kulenovića i Berbera. Sve se više u medijima pominje izgradnja spomenika u njihovu čast. Dokle se došlo sa tim, za cijelu BiH značajnim, projektom?

Z. HUJIĆ: Općina Bosanski Petrovac pokrenula je pitanje vrednovanja značajnih ličnosti, a pogotovo onih koji su svojim kulturnim, naučnim, obrazovnim i duhovnim radom doprinijeli kako u oblastima u kojim su djelovali, također i svojim radom istakli se u humanosti. Takav primjer su i ova naša četiri velikana Jovan Bijelić, Ahmet Hromadžić, Skender Kulenović i Mersed Berber. Ideja spomenika velikanima Bosanskog Petrovca je došla u fazu kada se trebaju stvoriti zakonske pretpostavke za realizaciju projekta, poštujući prije svega sve zakonske norme, ali i mišljenje svih zainteresiranih, Općinskog vijeća Bosanskog Petrovca i građana.

Koje su trenutne aktivnosti Općine i na kojim projektima će biti naglasak u 2015. godini?

Z. HUJIĆ: U 2015. godini nastaviti će se infrastrukturni projekti, a od ključnih su važnosti za poboljšanje kvalitete života građana. Planiramo izgraditi dodatnih 5,6 km kanalizacione mreže u gradskom centru iznosu većem od 500.000 KM, te nastavak izgradnje vodovodne mreže u koju će se investirati još 250.000 KM. Izgradnju kanalizacione i vodovodne mreže, a u sklopu projekta, u 2015. godini započet će i izgradnja prečistača otpadnih voda, gradskog kolektora, u koji će biti investirano 2,5 miliona KM. Biće izgrađena rasvjeta duž magistralnog puta M5 koji prolazi kroz Bosanski Petrovac, od ulaza do izlaza iz Grada, čime će se znatno povećati sigurnost na ovom dijelu ceste, a za investiciju osigurana su sredstva od 200.000 KM. Zbog poboljšanja saobraćajnica Općina Bosanski Petrovac planira da tokom 2015. godine izvršiti i rehabilitaciju asfalta na gradskim ulicama. Završiti će se projekt elektrifikacije dva povratnička mjesta Marjanovića Do i Vučkovića Do-Skakavac, koji električnu energiju nisu imali od završetka rata. Značajan projekt čiji se početak planira u ovoj godini je i sanacija komunalne deponije Vaganac. Projekt je u postupku pribavljanja saglasnosti, a za koju je Ministarstvo za zaštitu okoliša FBiH do 16. marta 2015. godine otvorilo javnu raspravu. Riječ je o projektu kojim bi se riješilo pitanje upravljanja čvrstim otpadom.

"Samo u prošloj godini izgrađeno je više od 10,5 kilometara nove kanalizacione mreže, čija je vrijednost veća od 1,5 miliona KM. Završena je druga faza vodovoda Kapljuh-Janjila sa vrijednošću 150.000 KM."



Etno selo Čardaklije, B. Petrovac

U TOKU RADOVI NA POKRIVANJU NOVE ZGRADE OPĆINE KAKANJ



U Ulici branilaca u Kakanju u toku su radovi na pokrivanju nove zgrade Općine Kakanj.

Nakon decenija pružanja usluga građanima u objektu koji je vlasništvo RMU Kakanj, nakon brojnih opravdanih sugestija i kritika da stara i trošna zgrada zbog arhitektonskih barijera ne pruža mogućnost da se građanima s posebnim potrebama omogući pristup svim službama koje pružaju usluge, te nakon informacije da će zgrada u kojoj su trenutno smještene općinske službe biti predmet prodaje, započela je izgradnja nove zgrade Općine Kakanj.

Vrijednost Ugovora o izvođenju grubih građevinskih radova na izgradnji zgrade Općine Kakanj (prva faza) iznosi 2.002.755 KM. Izvođač radova je Konzorcij "ITC" Zenica i "Trgošped" Kakanj.

U toku je i realizacija tenderske procedure za drugu fazu radova čijim će okončanjem zgrada biti spremna za useljenje.

Finansiranje izgradnje se vrši kroz odlično osmišljen model kojim je osigurano da ulaganje ne optereti Budžet Općine Kakanj.

Naime, prva faza radova se finansira iz sredstava ostvarenih prodajom poslovnih prostora koji su bili u vlasništvu Općine Kakanj. Ova sredstva, prema zakonskim odredbama, mogu biti utrošena samo za izgradnju novih objekata u vlasništvu Općine i ne mogu biti utrošena u drugu svrhu.

Poslovne prostore je trebalo prodati jer je bilo nužno izvršiti velika ulaganja u njihovu rekonstrukciju, a postojali su i veliki problemi u naplati iznajmljivanja ovih prostora.

Izgradnjom nove zgrade Općina Kakanj je dobila nove poslovne prostore koje trenutno prodaje po sistemu visoki ROH – BAU kako bi se obezbijedila sredstva za drugu fazu radova.

U novoj zgradi su izgrađene podrumске prostorije sa 52 mjesta za parkiranje. U suterenu će biti smještena šalter-sala, sala za vjenčanja i šest poslovnih prostora. Na tri etaže će biti radni prostori za općinske službe, sale za sastanke, sala za sjednice Općinskog vijeća, a objekat će sadržavati i veliki hol.

**KORISNI LINKOVI ZA
PREDPRISTUPNE FONDove EU:**

www.southeast-europe.net
www.adriaticipacbc.org
www.interregadriatico.it
www.europa.ba
www.cbib-eu.org
www.cbc.bih-mne.org
www.srb-bih.org
www.cbc-cro-bih.net
www.programmedeu.eu
www.tacso.org
www.euroinfocentar.ba
www.balkanfund.org
www.eurelmed.com
www.eacea.ec.europa.eu

Iznosi sredstava za odobrene projekte će biti od 10.000 KM - 70.000 KM. Dužina trajanja svakog projekta može biti od 6 do 11 mjeseci. Izabrani projekti se trebaju sprovesti u periodu april 2015. – mart 2016. godine.

JAVNI POZIV ORGANIZACIJA CIVILNOG DRUŠTVA

Općine Cazin, Novo Sarajevo i Visoko, u saradnji sa Razvojnim programom Ujedinjenih nacija (UNDP), raspisali su Javni poziv organizacijama civilnog društva/nevladinim organizacijama za predaju Prijedloga projekata.

Razvojni program Ujedinjenih nacija (UNDP) i 12 jedinica lokalne samouprave (JLS) u Bosni i Hercegovini zajednički implementiraju projekt pod nazivom Jačanje lokalne demokratije/demokratije IV – LOD IV. Projekat finansira Evropska unija iz sredstava Instrumenta za pretprijetupnu pomoć (IPA) u iznosu od 2 miliona eura.

Iznosi sredstava za odobrene projekte će biti od 10.000 KM - 70.000 KM (konvertibilnih maraka). UNDP zadržava pravo da ne dodijeli sva raspoloživa finansijska sredstva u slučaju da projektni prijedlozi ne zadovoljavaju zadane kriterije.

Dužina trajanja svakog projekta može biti od 6 do 11 mjeseci. Izabrani projekti se trebaju sprovesti u periodu april 2015. – mart 2016. godine.

Tekstovi javnih poziva dostupni su na web stranicama općina:

Cazin- http://www.opcinacazin.ba/index.php?option=com_content&view=article&id=1953:oglas-za-predaju-prijedloga-projekata&catid=44:sve-vijesti&Itemid=81

Novo Sarajevo - <http://www.novosarajevo.ba/press/19663-javni-poziv-organizacijama-civilnog-drustva-nevladinim-organizacijama>

Visoko - <http://visoko.gov.ba/ba/pregled-novosti/februar-2015/javni-poziv-organizacijama-civilnog-dru%C5%A1tvenavladinim-organizacijama.aspx>



Projekat finansira
Evropska unija



Ministarstvo pravde
Bosne i Hercegovine



Empowered lives.
Resilient nations.



Savez općina i gradova
Federacije BiH



Musala 5/1

71000 Sarajevo

Telefon: ++387 33 216 502, 209 024, 209 120

Fax: ++387 33 552 810, 216 502

E-mail: dino@sogfbih.ba

Pratite nas na:

Gledajte Savez općina i gradova
Federacije Bosne i Hercegovine na



Pratite Savez općina
i gradova FBiH na



Poštovani čitaoci,

putem ovog biltena pružamo Vam mogućnost da se informišete o aktivnostima Saveza, o bitnim dešavanjima u općinama i gradovima, aktivnostima naših partnera, institucija vlasti, kao i o razmjeni najboljih iskustava i praksi.

Na ovaj način Vam, također pružamo informacije o održanim konferencijama, seminarima, radionicama, okruglim stolovima, javnim raspravama, o održanim sjednicama organa i tijela Saveza.

Ukoliko želite da se prijavite za primanje ovog biltena možete to učiniti tako što ćete poslati e-mail na: dino@sogfbih.ba

Molimo vas da informacije o našem biltenu proslijedite svim u vašoj i susjednim općinama i drugim zainteresiranim.

Ukoliko želite da objavite neke od vaših novosti, iskoristite bilten Saveza, koji je brz i efikasan način komuniciranja.

Sa zadovoljstvom očekujemo vaše komentare, sugestije i primjedbe.

JAVNI KONKURS FONDA ZA ZAŠTITU OKOLIŠA ZA DODJELU SREDSTAVA



Fond za zaštitu okoliša Federacije BiH objavio je Javni konkurs za dodjelu sredstava za realizaciju programa, projekata i sličnih aktivnosti iz područja zaštite okoliša za 2015. godinu.

Prijaviti se mogu: U skladu sa vrstom

programske aktivnosti na koju apliciraju, pravo učešća imaju: pravne osobe, jedinice regionalne i lokalne uprave (kantoni, gradovi i općine), javne ustanove, privredna društva i druge pravne osobe.

Predmet Javnog konkursa je dodjela sredstava Fonda za zaštitu okoliša FBiH za programe/projekte, koji će se finansirati u okviru sljedećih programskih aktivnosti:

LOT 1. Projekti zaštite voda od značaja za FBiH po Odluci Vlade FBiH;

LOT 2. Projekti i studije u cilju ispunjavanja ciljeva Federalne strategije zaštite okoliša;

LOT 3. Projekti uspostavljanja federalne mreže monitoringa kvaliteta zraka;

LOT 4. Projekti zaštite okoliša kao podrška razvoja lokalnih zajednica;

LOT 5. Projekti jačanja javne svijesti o značaju zaštite okoliša;

LOT 6. Projekti u oblasti zaštite zraka i energetske efikasnosti.

Rok za prijavu: Javni konkurs je objavljen 04.3.2015. godine i ostaje otvoren 30 dana od dana objave.

http://www.fzofbih.org.ba/v2/vijest.php?akt_id=129

